

DOMENIE VI «VIE PAL AN»

Antifone di jentrade cf. Sal 30,3-4

Viôt di jessi par me, Diu, une crete che mi pare,
parcè che tu tu sêts la mêt fuarce e il gno ripâr;
par rivuart dal to non tu mi indreçarâs.

Colete

Diu, che tu disis di fermâti vulintîr tai cûrs onescj e sclets,
danus la gracie di jessi propit cussì,
par che tu ti indegnis di fâ di nô la tô cjase.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jer 17,5-8

Maledet chel che al sta fidât tal om; benedet chel che al sta fidât tal Signôr.

Dal libri dal profete Jeremie

Il Signôr al dîs cussì:

«Maledet l'om che al sta fidât tal om
e che al fâs de cjar la sô fuarce
biel che al slontane dal Signôr il so cûr!
Al è tant che un tamarisc inte pustote,
che no si inacuarç cuant che al rive il ben,
ma che al vîf framieç de arsetât dal desert,
tune tiere salade là che nol è a stâ nissun.

Benedet l'om che al sta fidât tal Signôr
e che al è il Signôr la sô sperance!

Al sarà tant che un arbul plantât ad ôr da l'aghe,
che al slungje lis sôs lidrîs viers dal riul;
no si inacuarç cuant che al rive il grant cjalt
e lis sôs fueis a restin verdis;
parfin tal an dal sut no si scompon
e nol soste di butâ fûr lis sôs pomis».

Peraule di Diu.

SALM RESPONSORIÂL dal Salm 1

R. Furtunât chel che si fide dal Signôr.

Furtunât l'om che nol va daûr dal consei de int triste,
che no si ferme su la strade dai pecjadôrs
e che te congreghe de int cence sintiment no si sente,
ma te leç dal Signôr si console
e la sô leç dì e gnot al rumie. **R.**

Al è come un arbul plantât ad ôr des aghis,
cjamât di pomis te stagjon juste
e lis sôs fueis no colaran par mai;
a laran in puart dutis lis sôs voris. **R.**

No cussì ve, no cussì pe int triste:
a son come il stranc che l'aiar lu sparnice.
Parcè che il Signôr al cognòs ben il troi de int juste,

ma la strade dai triscj e va in ruvine. **R.**

SECONDE LETURE 1 Cor 15,12.16-20

Se Crist nol è resurît, la vuestre fede no vâl nuie.

De prime letare di san Pauli apuestul ai Corints

Fradis, se si predicje che Crist al è risussitât dai muarts, cemût puelial dî cualchidun di vualtris che no esist resurezion dai muarts? Di fat se no esist resurezion dai muarts, nancje Crist nol è resurît; e se Crist nol è resurît, la vuestre fede no vâl nuie e vualtris o sêts ancjemò tai vuestris pecjâts. E ancje chei che si son indurmidâts in Crist a son pierdûts. Se nô o vessin sperance in Crist dome par cheste vite, o saressin i plui disgraciâts di ducj i oms.

Ma invezit Crist al è stât risussitât dai muarts, primizie di chei che a duarmin.

Peraule di Diu.

CJANT AL VANZELI Mt 11,28

R. Aleluia, aleluia.

Vignît di me, ducj vualtris che o sêts stracs e masse cjamâts,
e jo us fasarai polsâ, al dîs il Signôr.

R. Aleluia.

VANZELI Lc 6,17.20-26

Furtunâts vualtris puars, parcè che il ream di Diu al è vuestri.

Dal vanzeli seont Luche

In chê volte, Jesù dismontât jù cui Dodis, si fermà suntun plan. E jere une grande schirie di dissepui e une grande fulugne di int vignude di dute la Judee, di Jerusalem e dal oramâr di Tîr e di Sidon.

E Jesù, alçant i vòi viers dai siei dissepui, ur diseve:

«Furtunâts vualtris puars,
parcè che il ream di Diu al è vuestri.

Furtunâts vualtris che cumò o vêts fan,
parcè che o sarêts saceâts.

Furtunâts vualtris che cumò o vaîs,
parcè che o ridarêts.

Furtunâts vualtris cuant che chei altris us odearan e us butaran di bande, cuant che us svilanaran e a spresearan il vuestri non tant che vergognôs, par colpe dal Fi dal om. Stait contents in chê dì e gjoldêt, parcè che la vuestre ricompense e je di sigûr grande tai cîi. Di fat a fasevin precîs i lôr paris cui profetis.

Ma puars mai vualtris che o sêts siôrs,
parcè che o vêts za vude la vuestre consolazion.

Puars mai vualtris che cumò o sêts passûts,
parcè che o varêts fan.

Puars mai vualtris che cumò o ridêts,
parcè che o sarêts avilâts e o vaiarêts.

Puars mai vualtris, cuant che ducj i oms a disaran ben di vualtris; di fat a fasevin precîs i lôr paris cui profetis fals».

Peraule dal Signôr.

Su lis ufiertis

Cheste nestre ufierte, Signôr, che nus fasi tornâ monts e gnûfs

e ur siguri un'eternitât furtunade

a di chei che a fasin la tô volontât.

Par Crist nestri Signôr.

Antifone a la comunion cf. Sal 77,29-30

Lôr ind àn mangjât fin passûts
e Diu al à sodisfate la lôr brame;
la lôr gole no je stade deludude.

Daspò de comunion

Daspò di vênum sostentâts cul pan dal cîl,
danus, Signôr, la gracie
di vê simpri fan des robis che nus sigurin la vere vite.
Par Crist nestri Signôr.